

TEZAUUR LITURGIC
12 OCTOMBRIE

ACATISTUL
SF. CUVIOS
PAVEL STOJKOV
DE LA
TAGANROGSK
II



MOSCOW, 2000



Акафист

святому праведному Павлу Таганрогскому

Кондак 1

Избранный угодниче Христов, Егоже ради юродство на себе восприявый и тако в миру поживый, мира суетныя оковы отвергнувый, святой блаженный старче Павле, похвальное приносим ти пение, яко множество чад духовных молитвами и делами благочествия на тесный путь спасения наставил еси, ты же, яко имеяй дерзновение ко Господу, моли избавитися нам всякие язвы душевныя и телесныя, любовьию зовущим ти:
Радуйся, старче Павле блаженный, Таганрогский чудотворче!

Икос 1

Ангелом на земли уподобитися возжелавый, от юности своея богатства и красоты мира сего отвративыйся, отче блаженный, милостыни ради имение родительское расточивый, истинное сокровище на небесех стяжал еси. Мы же, таковому твоему благоразумию дивящися, с радостию глаголем ти сицевая:
Радуйся, корени благороднаго отрасли

пречестная,
Радуйся, сонаследнице Царствия Небеснаго.
Радуйся, класе обильный, из земли кролевецкия
прозябший,
Радуйся, светильниче веры, в граде Таганроге
просиявший.
Радуйся, нищелюбия и милосердия ревнителю,
Радуйся, любостяжания и сквернаго прибытка
обличителю.
Радуйся, крине целомудрия благоуханная,
Радуйся, молитво ко Творцу непрестанная.
Радуйся, старче Павле блаженный, Таганрогский
чудотворче!

Кондак 2

Видя тягу таковую к богоугодному житию,
родитель твой, промыслу Божию вняв, все
попечение о тебе на Господа возложив, отпусти
тя на путь странничества, благословляя. Ты же,
любовию Божией движимый, устремил еси
стопы своя по святым местам, заповеди
блаженств евангельских ревностно исполняя,
верно служил еси Богу, выну взывая: Аллилуия!

Икос 2

Разумом ко Единому всея твари Творцу
непрестанно возносяся, Царствия Божия присно
взыскуя, Павле блаженне, оставил еси дом
отчий, пришед в пределы придонския, желая в

тяжцем повизе юродства Христу поработати, во мнимое безумие облеклся еси. Мы же, грешнии, сия ведуще, толикое твое рвение по Бозе ублажающе, взываем ти:

Радуйся, измлада страх Божий в себе носивый,
Радуйся, велие усердие к службе церковней проявивый.

Радуйся, сладкая грозде винограда духовнаго,
Радуйся, отгнателью всякаго помысла греховнаго.

Радуйся, дворянския чины и звания ни во что же вменивый,

Радуйся, странническое житие возлюбивый.

Радуйся, суетнаго богатства мира сего отвративыйся,

Радуйся, старче Павле блаженный, Таганрогский чудотворче!

Кондак 3

Силою благодатною свыше укрепляемый, дни и нощи, в трезвении и молитве провождаше, святче Божий, на всяк час не давал еси сна очима своима якоже и ангелы изумлени бяху мышцею благочествия твоего, воспевая Богу: Аллилуия!

Икос 3

Имея себе любезною материю Церковь Православную, Павле блаженне, яко заботливое чадо, заповеди Божии опасно исполнял еси,

Святых Таинств почасту приобщался еси, и тако, в добродетели от силы в силу возрастая, воистину соделался еси причастник славы Божией, Емуже с лики угодников ныне предстоиши. Мы же, таковаго богоугоднаго жития твоего не могуще премолчати, со умилением глаголем ти тако:

Радуйся, дар прозорливости от Христа Бога восприявый,

Радуйся, благодатию Духа Святаго ликом просиявый.

Радуйся, персте, волю Божию нам, в неведении сущим, указующий,

Радуйся, бальзаме, наши язвы душевныя изрядно врачующий.

Радуйся, просвещающая сумрак светолучная зарнице,

Радуйся, веселящая сердце сладкозвучная цевнице.

Радуйся, правило поста и покаяния непреклонное,

Радуйся, кадило молитвы к Богу благовонное.

Радуйся, старче Павле блаженный, Таганрогский чудотворче!

Кондак 4

Буря и трус велий быста в море, якоже и кораблю заливатися волнами, тогда страх и ужас нападе на поклонников иерусалимских,

плавающих люте, имже гибель предстояще
вскоре в пучине, аще бы не крепкое упование их
на благодатную помощь твою, блаженне Павле.
Ты же, яко скорый заступник, нимало не
закоснев, в светозрачных одеждах явился еси,
и абие воды морския укротил еси именем
Иисусовым, Емуже взывати научил еси
спасенных тобою: Аллилуия!

Икос 4

Слышаще о безприкладных подвизах твоих, вси
страждущии и обидимии притекаху к тебе,
угодниче Христов, утешения чающе, понеже
воистину светлым чертогом царским показася
им тесная и убогая келия твоя, всем приют
дающая воспевающим ти тако:

Радуйся, стенания на веселие преложение,

Радуйся, материнских слез осушение.

Радуйся, в житейских делах поможение,

Радуйся, блуднаго разжения угашение.

Радуйся, жар дневной терпящим орошение,

Радуйся, всем скорбящим в горе утешение.

Радуйся, сущим в болезнях и обстояниях скорое
поможение,

Радуйся, града Таганрога похвало и украшение.

Радуйся, старче Павле блаженный, Таганрогский
чудотворче!

Кондак 5

Боголюбивая душа твоя возмутишеся зело, егда вражии корабли, Керчь разориша, в понт Азовский вторгшася, и гибелью жителям Таганрога угрожаша. Тогда ты, блаженный старче, за отечество наше земное крепко болезнуя, о даровании победы воинству русскому на супостаты усердно молился еси, сограждан своих стойко подвизатися за веру, царя и отечество призывая, да тии зряще во бранех несумненную помощь Божию оружию русскому, с благодарностию дерзновенно вопиют Небесному Царю славы: Аллилуия!

Икос 5

Видяще тя соборный протоиерей, молящегося посреде храма, в ризы ангельския облаченна, и чудяхуся, како на тебе, дивный старче, исполнился еси глагол Христов: "добрый рабе, благий и верный, о мале был еси верен, над многим поставлю тя". Сего ради приими убо от нас недостойных похвалы сицевыя:

Радуйся, обличителю нечестия беззлобный,
Радуйся, девственниче ангелоподобный.
Радуйся, терпения крепкий адаманте,
Радуйся, неискусобрачия драгий бриллианте.
Радуйся, недужным и немощным посещение,
Радуйся, язв душевных елеем радования
умощение.

Радуйся, священников благоговейных
изумление,
Радуйся, ангелов небесных удивление.
Радуйся, старче Павле блаженный, Таганрогский
чудотворче!

Кондак 6

Проповедником нестяжания тленных сокровищ
мира сего явился еси, Павле блаженне, яко не
точию мнози от простых, но и богатии и
именитии, требующе твоих наставлений, в
послушание тебе вдаяху себя совершенно. Ты
же, по торжищам иногда ходя и тайныя
помышления торжников ведая, человеческия
пороки изобличал еси, преждедеченное Давидом
царем глаголюще: "богатство аще течет, не
прилагайте сердца". Темже и мы, о словесех
псалмопевца тобою наущаемии, выну зовем
Богу: Аллилуия!

Икос 6

Возсиял еси, яко маяк светолучный, путь ко
спасению указующий и к небесному пристанищу
верно приводящий всех блуждающих во тме по
морю житейскому. Мы же, ведая, яко по словеси
Господню ты воистину явился еси ловцом
человеков, старче благий, благодарственное
пение приносим ти:
Радуйся, волнения морския укрощающий,

Радуйся, мрежи рыбарские наполняющий.
Радуйся, ветрам и стихиям повелевающий,
Радуйся, бури страстей угашающий.
Радуйся, луче, мрак греховный просвещающий,
Радуйся, кормчий, к благоотишному берегу суда
направляющий.
Радуйся, яко утопающих от бездны избавляеши,
Радуйся, яко человеків прилежно уловляеши.
Радуйся, старче Павле блаженный, Таганрогский
чудотворче!

Кондак 7

Хотяй юноша Николай поучитися от тебе в
беседе духовной, и поведал еси ти, како по
твоим, старче, молитвам, отверзостася ему очи
духовнии, егда приспе время службе церковной,
и абие, воззрев очима, увидел еси ангелов
небесных во святем алтаре чинно порядку
служащих, иереи же недостойнии, аки путами
некими связани быша, и той ужасеся таковаго
страшнаго видения и зело смущен бысть. Но
твоими, Павле, словесы наставляемь, познал еси,
яко ни козни диавольския, ни слабости
пастырей и паствы не возмогут поколебати
Святую Церковь Православную, яже имать быти
до скончания мира, Богу же, чрез тебе Его
вразумившему, воспел еси: Аллилуия!

Икос 7

Новое солнце земли русския незакатное,
праведный пастырь и чудотворец
Кронштадтский Иоанн, ведая твое богоугодное
житие, не могущее, якоже свеча на свещнике,
от мира утаится, нарече тя, отче блаженне,
столпом, утвержденным от земли до неба. Мы
же, в добродетели убозии и в молитве
немощнии, толикую твою благоуветливость к
худости нашей зряще, воистину тя столпом и
опорою имамы, выну к заступлению твоему
прибегая, сицевое пение приносим ти:
Радуйся, яко троическому поклонению нас
наставляеши,
Радуйся, яко души верных благодатию питаеши.
Радуйся, яко трудников боголюбивых щедро
угощаеши,
Радуйся, яко лихоимцев, корыстию одержимых
тщи отпускаеши.
Радуйся, темных суеверий и предрассудков
искоренителю,
Радуйся, безбожных и нечестивых уст
заградителю.
Радуйся, обновлению покаянием пламенный
проповедниче,
Радуйся, доброму Пастырю Кронштадтскому
собеседниче.

Радуйся, старче Павле блаженный, Таганрогский чудотворче!

Кондак 8

Странник и пришелец был еси на земли, небеснаго града присно взыскуя, яковых же скитальцев призре щедродательная десница твоя, обаче провидя все стези из прозорливым оком, молитвы за сущих в пути и далече возносил еси к Богу, и Той на всяко время промышляше о них. Темже и мы, прославляюще тя, прославльшему тя Богу вопием: Аллилуия!

Икос 8

Всем был еси вся, Павле блаженне, словом спасения дальних и ближних непрестанно назидая; немощи и болезни претруднаго телеси своего безропотно неся, достигл еси маститыя старости, и се приближися время твоего к Богу отшествия, обаче неутомимаго попечения о душах человеческих ради простре Господь срок живота твоего и пробави еще лет пятьнадесять. Ты же, любовью всех объемля, чад своих духовных не хотяще осиротити, потщился еси оставить по себе блаженную старицу Марию, присную свою келейницу и ученицу. Ведуще тя тако о спасении всех печалаящаяся, со умилением взываем ти:

Радуйся, Царствие Небесное нищетою духа

стяжавший,
Радуйся, яко утешен бысть, прежде же
плакавший и рыдавший.
Радуйся, наследниче, кротостию землю новую
наследивый,
Радуйся, правдолюбче, алчною и жаждою
правды ся насытивый.
Радуйся, милостиве, яко от Бога помилован еси,
Радуйся, боговидче, яко чистым сердцем Бога
узрел еси.
Радуйся, сыном Божиим нарецыся, миротворче
известный,
Радуйся, гнанный правды ради, яко таковых
есть Царство Небесное.
Радуйся, Христа ради поношение сновивый,
ныне же ублажаемый от всех,
Радуйся, блаженне, и веселися, яко мзда твоя
много на небесех.
Радуйся, старче Павле блаженный, Таганрогский
чудотворче!

Кондак 9

Вся силы телесныя оставиша странницу
Гликерию и жизнь ея угасла еси, душа же, от
земных уз разрешившись, в чертозах небесных
пребывала еси, со удивлением созерцая тамо
тебе, старче святой, в будущей блаженной
жизни во славе велией веселящаяся. Дщерь же ея
Лукия тело к погребению уготованное слезами

орошала еси, егда умершая по твоим, Павле, молитвам ко Христу, абие оживе и воста здрава. Мы же, о чудеси сем дивящися, како по твоём глаголу сень смертная расточается и надгробное рыдание на радование прелагается, благодарственно вопием жизнедавцу всех Богу: Аллилуия!

Икос 9

Витийство бусловов суетумудренных, завистию исконнаго врага спасения одержимых, во уметы вменил еси, Павле блаженне, яко единого Христа приобрел еси себе заступника и оправдителя; мы же, поминающе кротость твою и незлобие, веры исполненное, ублажаем тя, глаголюще тако:

Радуйся, злато, добле прошедшее горнило смирения,

Радуйся, серебро, жаром клевет восприявшее очищение.

Радуйся, воду поношения усердно испивший,

Радуйся, врагов своих тепле возлюбивший.

Радуйся, в укорениях - благословение,

Радуйся, в гонениях - терпение.

Радуйся, в похулениях утешение,

Радуйся, в злословиях - радование.

Радуйся, старче Павле блаженный, Таганрогский чудотворче!

Кондак 10

Немощию телесною и подвигами жития
утружденный, хотя душу свою ко отшествию от
мира сего уготовати, призвал еси духовника
своего иеромонаха Дамиана и, воззревши нань,
предрекл еси ему величие и славу, понеже не
сущая ко сущая провидел еси ты по дару Духа
Святаго, Павле блаженне; он же, реченное тобою
в сердце своем слагая, непщеваше разумети о
словесех твоих. Девятому убо надесять лету
минувшу, восшедшу же ему на служение
патриаршее во святом граде Иерусалиме, во
исполнение пророческаго гласа твоего, и той,
вельми возрадовася о исполнении таковаго
славнаго назнаменованя, благодарственная
возопил естъ Богу: Аллилуия!

Икос 10

Стены каменнии не возмогоху укрыти
острожников, в узилищах вчиненных, от твоей,
милостивный старче, любви и попечения. Мы
же, удивляясь таковому твоему рачению о
сущих в тесноте и лишениях, сретаем тя
приветствии сими:

Радуйся, в законопреступных душах страх
Божий пробудивый,

Радуйся, стражей темничных милосердию к
падшим научивый.

Радуйся, о угнетенных слезный печальниче,

Радуйся, о плененных теплый молитвенниче.
Радуйся, манно, ухлебляяй алчущих,
Радуйся, источниче, напоываяй жаждущих.
Радуйся, узников к раскаянию во гресех
студных обращааяй,
Радуйся, непостыдныя кончины и погребения
усопших сподобляяй.
Радуйся, старче Павле блаженный, Таганрогский
чудотворче!

Кондак 11

Лепо есть пети тихое преселение твое от земных
к небесным, старче святыи, яко не точию в
житии, но и во успении своем дивными
знаменами просиял еси. Прилучи же ся в
туюжде ноць протоиерею Василию видети душу
твою светлыми ангелы на небо влекому, и абие,
от сна возбнув, исполнися страха и трепета,
народи же таганрогстии, славное отшествие
твое и чудеса ту бывающия слышаще, и не
могуци проторгнутися ко гробу твоему, на
погост несомому, многого скопления людскаго
ради, овии на забрала и на кровы полатныя
возлезаху, овии далече наперед забегаху и на
высокия дрeвеса лепяхуся, да всяко возмогут
оттуду на гроб твой взирати, овии же в перси
себя ударяху, сиротство свое оплакивая; и
рыдания прерываху умиленную песнь их к Богу:
Аллилуия!

Икос 11

Светоприемною свещею в нощи безбожия
возсияла есть нам убогая могилка твоя, старче
блаженный, егда земля наша, юже видел еси ты
благу и цветущу, сотворишеса вся запустенна и
кровьми святых напоенна; Церковь Русская
сетующа и буйными мятежы и распрями
раздираема, храмы Божии разрушенны и
оскверненны; и егда плачь наш паче
вифлеемскаго плача превзошел еси: тамо бо
токмо едины младенцы побиваемы бываху, zde
же ни старии, ни малии, ни богатии, ни убозии
не пощадени бысть; и тогда ты, Павле
досточудне, скорое заступление подавал еси
всем ко гробу твоему притекающим и в
молитвах тя призывающим, слышащи от всех
таковая:

Радуйся, яко иудеом соблазн, безбожным же
безумие гроб твой явися,

Радуйся, яко чудесы и щедротами твоими мир
озарися.

Радуйся, яко новых мучеников кровию могила
твоя окропися.

Радуйся, яко с телесы тех вкупе новая слава в
ню вселися.

Радуйся, яко до концев земли русския слава
твоя достиже,

Радуйся, яко благодатным поможением не

закосянеши николиже.

Радуйся, пред образом Божиим лампадо
неугасимая,

Радуйся, яко всем неоскудно подаеши просимое.

Радуйся, старче Павле блаженный, Таганрогский
чудотворче!

Кондак 12

Божественная благодать явися на тебе, Павле
блаженне, и неизреченное чудо дивно показася,
егда бо принесение святых мощей твоих
совершашеся. Тогда вси людие с трепетом
узреша, како светило солнечное красуяся, к
высоте небесней возшедши, възиграше, кругами
радужными аки венцем неким окруженно,
лучами радостно испущающе и всюду
светящеся, показуя сим чудом, како прославляет
Бог любящия Его. Да вси, зряще сие, ко святей
раце твоей усердно притекающе и исцеление в
недузех приемлюще, с благодарностию
воспевают хвалебную песнь тобою
благотворящему всем Небесному Царю Славы:
Аллилуия!

Икос 12

Поюще дивныя подвиги твоя, земный ангеле и
небесный человеце, воистину недоумением
колеблемы есмы, кими гласы ублажити тя, или
кими глаголы похвалити тя, Павле досточудне,

исповеднику Павлу тезоимените, яко целому сонму угодников преславнейших уподобился еси. Се бо язык связуется, гортань премокает и крепость наша изнемогает, како изрещи доброты твоя, понеже чудеса твоя умножишася паче звезд небесных. Мы же недостойнии, со всяческим усердием почтити тя мняще малыми словесы сицевыми, обаче и много именованство стяжал еси, яко многими благодатьми обогатился еси, тако нареци тя дерзаем: Радуйся, новый Еноше, добрым житием Господеви угодивший, Радуйся, Ное, убогое жилище свое ковчегом спасения учинивший. Радуйся, Аврааме, гостеприимством ко ближним Святей Троице послуживший, Радуйся, прекрасный Иосифе, целомудрием не земной, но небесный венец получивший. Радуйся, Лазарю, на лоне праотечнем достойно возлегший, Радуйся, премудре, вкупе с мудрыми девами в чертог брачный восшедший. Радуйся, новый Николае, яко стихии укрощаеши и обуреваемыя соблюдаеши, Радуйся, Пантелеимоне, яко струпы душевныя и телесныя исцеляеши. Радуйся, милостивый Спиридоне, яко не оскудевает щедродательная десница твоя,

Радуйся, странноприимниче Сампсоне, яко не запустевает убогая келия твоя.

Радуйся добрый самарянинне, яко милосердие к убогим проявляеши,

Радуйся, Авелю тайновидче, яко пророчества своими судьбы предваряеши.

Радуйся, преподобне, яко честна пред Господем смерть преподобных его,

Радуйся, чудотворче, яко преизобилуют чудеса от гроба твоего.

Радуйся, старче Павле блаженный, Таганрогский чудотворче!

Кондак 13

О предивный угодниче Христов и преславный чудотворче, святыи блаженный старче Павле!

Приими сие малое моление наше, в похвалу тебе ныне приносимое, и призри милостивно с высоты небесныя славы твоя на нас

недостойных, к раце цельбоносных мощей твоих со умилением припадающих и от недугов

душевных и телесных исцеления чающих, и не остави нас попечением твоим до конца, якоже

обещался еси, но испроси у Владыки и Спаса нашего спасения душам нашим, да сподобимся

с тобою и со всеми святыми вечно в радости

блаженней воспевати Богу: Аллилуия, Аллилуия, Аллилуия.

Этот конда читается трижды, затем икос 1 и кондак 1

Молитва первая

О великий угодниче Божий и чудотворче, святой блаженный Павле! Ты, на высоту добродетелей восшед, яко пресветлая звезда житием твоим возсиял еси, и странническое жительство избрав, мира сего красная ни во чтоже вменил еси. Темже Всеправедный Судия многими чудесы тя прослави. Душу же твою святую в небесныя обители всели, идеже любви Божией наслаждаяся, и наши нужды зриши, прошения слышиши. Буди нам в недузех целитель, по морю плавающим кормчий и утопающим благонадежное избавление. Молим тя, Павле блаженне: испроси всем, во всякой нужде сущим и ко твоему заступлению прибегающим, всякий дар коемуждо благопотребен: веры и любви преспеяние, благочестия умножение, мира утверждение, больным исцеление, печальным утешение, бедствующим помощь, обидимым защищение. И сподобы ны, угодниче Божий, молитвами твоими благочестно житие земное скончати, Небесное Царствие и живот вечный унаследити, со святыми, в безконечныя веки веков. Аминь.

Молитва вторая

О преблаженне угодниче Христов Павле, южных пределов страны нашае пред Господем заступниче! Ты еще во плоти сый, красная мира сего Христа ради ни во чтоже вменил еси, и на путь спасения люди словесы и деяньми наставлял еси. Был бо всем приходящим к тебе скорый помощник и молитвенник. И ныне в вышних Святей Троице предстоя, имаши сугубое дерзновение ко Владыце, освяти бо тя Господь Вышний яко Своего угодника. Блажен есть воистину град и место, на немже положено бысть честное тело твое. Сего ради молимся тебе: буди и нам помощник и заступник, избавляй нас от враг видимых и невидимых, такожде и всех, не токмо zde во граде Таганроге, но и всюду призывающим имя твое святое. Призри, преблаженне Павле, на нас многогрешных, ныне творящих память твою, и милостив буди нам с верою притекающим к многоцелебным мощем твоим, яко да спасени будем твоими молитвами, и непрестанно славим Пресвятую Троицу, Отца и Сына и Святаго Духа, ныне и присно и во веки веков. Аминь.

